



Krave ostale u kamionu: Državne institucije čuvaju dostojanstvo (Foto: S. Jordamović)

Protesti Udruženja poljoprivrednika

Kravama zabranjen pristup državnim institucijama

U petak rasprava o Zakonu o zaštiti domaće proizvodnje

Predstavnicima Udruženja poljoprivrednika policija jučer nije dozvolila da dovedu krave pred zgradu Ustavnog suda BiH, obrazlažući tu odluku poštivanjem dostojanstva Suda i Predsjedništva BiH, koji se nalaze u istoj zgradi. Šest krava zadržano je u kamionu pedesetak metara od zgrade.

- Uredno smo najavili dolazak krava pred Ustavni sud i nismo dobili nikakvu zabranu - kaže predsjednik Udruženja Miro Pejić.

Poljoprivrednici su se okupili dva dana prije sjednice Ustavnog suda na kojoj bi trebala biti donesena konačna odluka o Zakonu o zaštiti domaće proizvodnje.

- Želimo iskazati nezadovoljstvo što strani suci tek sada, dva dana prije rasprave, preuzimaju materijale za donošenje ovako bitne odluke - kazao je Pejić i dodao da „ne postoji nijedan argument da ovaj zakon ne bude usvojen“.

Zaboravili opanke

Ljubo Maletić iz Bijeljine ocijenio je sramotnom odluku da se kravama ne dozvoli pristup državnim institucijama.

- Ima u tim institucijama dosta seljaka i seljačke djece, ali oni su se dočepali udobnih fotelja i zaboravili gumene čizme i opanke. Odvojili su se od vlastitog naroda. Znaju li oni da ih mi proizvođači izdržavamo - kazao je Maletić za „Avaz“.

Ako Sud donese odluku kojom nisu zadovoljni, najavljuju nove proteste pred ovom, ali i drugim institucijama.

Ustavni sud BiH početkom jula privremeno je obustavio primjenu Zakona o zaštiti domaće proizvodnje do donošenja konačne odluke.

G. M.